



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 7



Macron-i Damascus semdangba mapang bomb ana apok



Sanjeev Jain North Korea ambassador asütsü shimogo

VOL. XXIII ISSUE NO. 265 (ADOK 265) DIMAPUR RASEMNÜ (WEDNESDAY) CHITENI (JULY) 08, 2026

₹ 5.00

Chümoukedima DC-i NH 29 atema metetdaksür

Dimapur, June 7, 2026 (TYO): Chümoukedima district administration NH 29 nung Chathe bridge-Tsiedukhru-Khuokhi bridge aser Kukidolong nung kanga kümdanga s e n z ü s e n b o n g t s ü metetdaksüogo.

Tzünglu kanga arudang aser aonung kanga kümdanga senzüsüla kechiyong tia makara anentsüh aser lung tsükba lendong ajurutsü akok ta Deputy Commissioner-i ashi.

Paisa senzusenbonger ajaki traffic diversions sülen anidaksü aser ketdangpurtemi ashiba angatsü ayongzükogo.

NH 29 four-lane highway nung left-hand side (LHS) carriageway khien atema shibanga atar ta Chümoukedima DC-isa ashi.

Paisa gari lenmang dak sendakba osang ajak mamangtsü saka bangdakpur nungi official updates angatsü metetdaksüogo.

NH-329A nung RoW atema metetdaksür

Dimapur, July 7, 2026 (TYO): Chümoukedima Deputy Commissioner-i NH-329A nung Pimla Junction-Mhainamtsi stretch atema Right of Way (RoW) nung densema aliba ali kiburtem nem sangdong ka agütsüogo.

Gauhati High Court, Kohima Bench ajanga June 3, 2026 nü tetuyuba agütsüba ama Deputy Commissioner-i iba sangdong agütsüba nung Right of Way nung adener ali kiburtem maitsü jangjatsü, claims mesüra disputes aliba jangjatsü, ali kiburtem dang nungi undertakings meshitsü aser okadak compliance reports agütsütsü shia lir.

Chümoukedima district kübok Pimla Junction nungi Mhainamtsi tashi NH-329A alignment nung ali kiburtemi iba sangdong agütsüba sülen anogo 30 tsüngda Deputy Commissioner office nung claims mesüra objections agütsütsü metetdaksüogo.

Chümoukedima district administration-isa ali kiburtem aser tejangaba nisungtem dang mapang atakzükba tsüngda documents agütsütsü shisem.

Iba dak sendakba osang tejangja metetnürtemi Deputy Commissioner Office, Chümoukedima nung office hours mapang tongteptsü metetdaksüogo.

Imphal nung Naga aser Meitei tsürtem külemi longjemer lungkak ait

Imphal, July 7, 2026 (Agencies): Mongulbarnü Imphal nung Naga aser Meitei tsür noklang aikati joint sit-in protest ka ayonga agiogo.

Khwairamband Ima Keithel nung agiba sentong nung Naga civilians trok tepsetba atema temeten meshi aser Manipur nung yimjung bener arutsü takhangba agütsüogo.

Manipur sorkari Monsoon Session balaka jazüka amentsüla aser idangji law and order tensa asadangtsüla aser teti atema yimjung bener arutsü asoshi asalentong renemtsüla ta lungkak aitertemi ashi.

Iba sentong ya Naga People's Union Imphal, Imphal Naga Business Association, Kwairamband Nupi Keithel, Ima Gi Meira, Foothills Naga Coordination Committee (FNCC), aser United Zeliangrongpui Coordination Committee (UZCC) külemi yaritepa ayongzük.

Parnoki "Stop proxy war", "Go back Central Forces", "Terrorists, stop killing innocents", aser "Justice for six

brutally murdered Liangmai Nagas" amala tezülubatem amer lungkak ait aser iba sentong agidang Imphal yimti nung shishilembadak ajak shibanga liasü.

Iba sentong ajanga Naga civilians trok tepsetertem ozüng tapet agi merenshitsü takhangba agütsür ta FNCC president Ng Akhiu-i ashi.

Iba sentong ajanga Naga aser Meitei nunger külemi temeten aser tebilemstü khuret abentsü atema akhangba sayur ta pai ashi.

Lungkak aitertemisa Tupul aser TM Kasom nung atalokba lendongtem asoshi temeten meshi, police-i pua aliba village volunteers chiochtsü aser Meitei nunger 30 tema samaba atema jungjunga bushisüngdang asütsü takhangba agütsüogo.

Parnokisa Kuki telungpur teloktem den Suspension of Operations (SoO) agreement agientsü, Kuki National Front-P (KNF-P) ya terrorist organization ka ama sangdongtsü aser Deputy Chief Minister Nemcha Kipgen mapa nungi anentsü takhangba agütsüogo.

Union MoS Rai-i Mokokchung semdanga CSS maparen reprangshi



Union Minister of State for Home Affairs, Government of India, Nityanand Rai den Mokokchung nung sorkar ketdangsürterm aser civil societies züngsemtem külemi agiba noksa ka angur.

Dimapur, July 7, 2026 (TYO): Union Minister of State for Home Affairs, Government of India, Nityanand Rai-i anogo ananü atema Mokokchung district semdangogo aser July 6, 2026 nü Head of Departments aser district-level officers den senden ka menogo.

Yashi pai Deputy Commissioner Conference Hall nung senden amendang centrally sponsored schemes (CSSs) takok ngua inyaksü nenshiogo. India sorkari mangdang aser nukjidongtem ayuba atongtsüsa inyaksüla ta paisa ashi.

Central schemes balala inyakba department temi teinyaksü tongti ajiteta inyaksüla aser public services tajungtiba agütsütsü atema action plans renemtsüla. Nübertem tajangzük angutsüsa mapa inyaksüla ta Union MoS Nityanand Rai-isa ayongzük.

Nagaland nung aluyimba tsütsü teinyaksü jenti lir aser alima rongsen tajung den organic farming atema mongpu tajung lir. Anungji nenoki tajungtiba agi aluyimba wadang inyaksüla ta paisa ashi.

Iba senden nung Head of

Departments aser District offices ajanga Mokokchung district nung centrally sponsored schemes inyakba osang tatsütsü lemsatop.

Senden nungsa Mokokchung Additional Commissioner Dr. Madhavi R. IAS (P)-i PowerPoint presentation ka ajanga district profile aser key development indicators indang lemsatop.

Senden nung mendenji Mokokchung Deputy Commissioner Ajit Kumar Verma, IAS liasü aser ADC (Hq) Mokokchung Atsung Walling, NCS-i anküp tepela o jembi.

Union MoS Nityanand Rai-isa Mokokchung district kübok Ungma yimtsüng semdang aser idakji development aser Cultural initiatives meyipa reprangshiogo.

Ungma nung pai community hall nung village council züngsemtem den ajurutepa sensaksema liasü.

India indang tashi aser tobur ajungbaji nisung temeyoktep aliba ajanga lir aser region shia nung sobaliba, inyaksangshi aser sobaliba senmang khenyongi balala lir aser iba ajanga linük indang maitsü tajung sayur ta Rai-

isa ashi.

Padma Shree Awardee Guru Sangyusang Pongener-i traditional art & culture wazüka ayuba aser ajungketba atema tenüngsang agütsür ta paisa shisem.

Ibala maparen ajanga tarutsü pututemi pei sobaliba senmang aser maitsü den sendaktepa alitsü ta Union MoS Rai-isa metetdaksü.

Prime Minister Narendra Modi lenisüba kübok India sorkari Viksit Bharat kübok tesem ajunga kasa renloksü aser tejakleni aotsü tenangzükba nung inyaka arur ta paisa ashi.

Iba mapang MoS Rai-i Ungma nung library building cum museum reprangdang aser yimertemi Aor aser Nagaland indang sobaliba takar wazüka ayuba aser sayuba mapa tajung inyakba atema tenüngsang agütsü.

Paisa Imkongliba Memorial District Hospital nung hospital building teyangludak semdanga liasü. Iba mapatong ya Ministry of Development of North East Region (MDoNER) kübok Purvotta Sampark Setu programme ajanga inyaker.

Ministry of Cooperation, Gol sentong nung Nagaland PACS aden



Dimapur, July 7, 2026 (TYO): Nagaland nung Primary Agricultural Cooperative Credit Societies (PACS)-i Ministry of Cooperation, Government of India indang 5 buba Foundation Day nung denogo.

Iba sentong ya July 6, 2026 nü Bharat Mandapam, New Delhi nung agi aser Union Home & Cooperation Minister Amit Shah aden.

Nagaland nung PACS 4 nungi züngsemtem iba sentong nung aden aser parnok ya Mokokchung aser Chümoukedima district tem nungi kaka aser Kohima district nungi ana liasü.

Iba sentong nung India sorkari cooperative movement akangshitsü atema mangdang yur inyakba aser cooperative sector ajanga rural development

ajungketba indang lemsatop.

NABARD aser Department of Cooperation, GoN ajanga iba maongka agütsüba atema kanga pelar ta Mokokchung district nungi Opangtemsu, Chumoukedima nungi Lhikhro Kreo aser Kohima district nungi Atsubou Sanchu o Khriehuto Yase nungeri sangdong ka nung metetdaksüogo.

Nagaland Angh-i Lok Bhavan nung IDAN den senden amen



Nagaland Angh-i Lok Bhavan nung IDAN den senden amenba mapang tangokba noksa angur.

Dimapur, Chiteni/July 07 (TYO): Nagaland Angh Nand Kishore Yadav-i July 7, 2026 nü Lok Bhavan, Kohima nung Investment and Development Authority of Nagaland (IDAN) den parnok inyakyim asadanga senden ka amen.

Iba senden nung IDAN ketdangsür temi Corporate Social Responsibility (CSR), investment promotion, Nagaland Skill & Entrepreneurship Development Mission (NSEDMD), Swavalamban Connect Kendra (SCK), Intellectual Property Facilitation Centre (IPFC), policy research, aser human resource development densema maparen balala

inyakba indang osang tejangja lemsatepa liasü.

Parnoki tawa takok angubatam, tang teinyakdak sentong tem, tongtipang tayongzükbatem, aser state nung investment facilitation aser rongsenketzung terenlok tashi itshitsü atema IDAN sentong balala lemsatepa liasü.

Angh-i sentong balala kübok terenlok alibatam reprangshim aser IDAN-i investment, entrepreneurship, skill development aser innovation ajungkettsü meranga inyakba asoshi tenüngsang agüja liasü.

Pai IDAN ketdangsürtem dang 'ease of doing business' tuluba kumdaktsütsü,

employment opportunities adokdaktsütsü, aser State nung lokti aser rongsenketzung terenlok tali tajungba kumdaktsütsü asoshi stakeholders tsüngta amalitep tashi itshitsü tongtipang ta ashi.

Angh Yadav-i sentong balala tajungba nung mapa kuma inyaktsü nüngdakba, entrepreneurs aser lanurtem nem outreach tali agütsüba aser investment atsür arutsü asoshi maneni inyaktsü nüngdaker ta ashi.

Senden nung tang aliba tayongzükba tem koktettsü asoshi tasa balala lemsatep aser State indang investment aser terenlok onüktem nung IDAN-i shilem tuluba agütsü indang jembia senden tembang.

80 buba Independence Day atema State renemshir

Dimapur, Chiteni/July 07 (TYO): State level nung 80 buba Independence Day amungtsü atema mapa alemtsü aser sentong yangluba indang jembishinütsü asoshi senden ka July 7, 2026 nü Nagaland Civil Secretariat, Kohima nung Home Commissioner, Nagaland, Abhijit Sinha, IAS lenisüba nung pa indang office chamber nung mena liasü.

Iba senden nung department balala nungi teshimtet lenirtem aser State level benjongmung dak sendakba nung ketdangsürtem dena liasü. Senden nung parade ketdangsüba, ceremonial sentong, sobaliba sentong, logistics aser tanga inyakyim densema maparen balala reprangshima liasü.

Shilem agiba departments aser agencies ajunga nem pei teinyaktsü mapa junga metetdaktsütsü mechi küm shia Independence Day amungtsü kanga jelia iba ama senden amener, ta mendenpuba Abhijit Sinha-i

ashi. Nagaland nung iba anogomung ya kanga meraketa amunger aser kasa mapang district ajunga nung sentong kasa yanglua amunger, ta pai ashi.

Sentong kanga shisa kaa yanglutsü aser mepetmesü madoki amalitep akatsü tongtipang lir, ta Home Commissioner-i ashi aser nüngdakba terenemshi mapa tenzüksü aser 80 buba Independence Day tajungtiba nung mungtettsü asoshi nüngdakba departments aser Deputy Commissioner ajunga nem totuyuba agütsütsü ta metetdaktsü.

Taoba mapang iba anogomung takok ngua amungtsü mechi department balalai bendanga agütsür inyakba asoshi pai tenüngsang agütsü aser ano sendaktepa aliba department ajunga dang kasa tangatetba nung taküm 80 buba Independence Day takok ngua mungtettsü asoshi inyaktsü ayongzükba liasü.

Mokokchung district nung Booth Level Agents shimtsü metetdaktsür

Dimapur, Chiteni/July 07 (TYO): Booth Level Agents (BLAs) shimtsü atema Chief Electoral Officer, Nagaland nungi totuyuba agütsüba ama Mokokchung District kübok recognized political parties ajunga dang Assembly Constituency nung Polling Station shia Booth Level Agents shimtsü mepishir aser nenshia metetdaktsür, ta Deputy Commissioner & District Election Officer, Mokokchung, Ajit Kumar Verma, IAS-i Mongulbarnü sangdong ka nung metetdaktsü.

Electoral roll shidak, ajak züngsema aser up to date atema aruya aliba Electoral Roll indang Special Intensive Revision (SIR) ya kanga tongtipang lir, ta ashi.

Iba inyakyim nung recognized political parties indang teshimtet nübu ka ama Booth Level Agents yagi tongtipang shilem agia

electoral particulars jangjaba, temsüa aliba electors jangjatepba, metokmeperi osang agütsüba aser Booth Level Officers (BLOs) den tajungba nung amalitep akaba nung tongti shilem agir.

Booth Level Agents temi yakyaka shilem agiba ajanga electoral roll reprangshiba inyakyim nung ochishia inyaktetba nung kanga tongzüker aser ajangzüker, ta sangdong ajanga ashi.

Special Intensive Revision ya kanga tongtipang asünung, recognized political parties ajungai Booth Level Agents (BLAs) shimba nung temulung agütsütsü aser Assemblu Constituency shia format nung yanglur tekeratiba nung Office of the Deputy commissioner & District Election Officer, Mokokchung nem agütsütsü metetdaktsür, ta DC & DEO Mokokchung ajanga ashi.

Manipur Angh-i Dzukou Valley semdang



Viswema nung Manipur Angh Ajay Kumar Bhalla agizükdang tangokba noksa ka yangi angur.

Dimapur, Chiteni/July 07 (TYO): Manipur Angh Ajay Kumar Bhalla-i July 7, 2026 nü Dzukou Valley semdanga liasü. Angh ya meina ketdangsürtem aru aser parnok Dzukou Valley bushia aodang Viswema nung sobaliba yimya amshia agizüka liasü.

Pa ya Deputy Commissioner, Kohima, B Henok Buchem, NCS; Superintendent of Police, Kohima, Krodi Rhetso, NPS; tanga ketdangsürtem, Southern Angami Public Organisation (SAPO) ketdangpur, aser Viswema Village Council züngsem temi

agizüka liasü.

Iba sülen Angh Bhalla ya Dzukou Valley leni Extra Assistant Commissioner (Kezocha), SDPO South, Medical Officer, police aser tourist guides temi anir ao.

SAPO tir Er. Tepul Hopovi-i Angh pela agizükba o jembidang, ibai junga ketdangsüba temaittsü lir ta ashi.

Pai Dzukou Valley nung takum aliba aser parnok müketa aliba indang rateta ashi aser akhi alemli mapang nungi Southern Angami nüburtemi iba tesem ya kibur ama wazüka arur ta shia liasü.

Iba lipak ya Nagaland indang natural heritage ka lir

aser ibai nature meimer ajunga indang lir, anungji iba tesem wazüka ayutsü aser ajungkettsü asoshi akaji merangtsüla, ta Hopovi-i ashi.

Iba lipak ya tzü-mopung melenshiaka meraksaba model, nüburtemi anir wazüka ayuba ama asütsüla, kong tarutsü putu asoshi libajen wazüka ayuba nung lisopur shisatsü aser sorkar sentong balala külemi inyaker, ta ashi.

SAPO tiri Angh nem traditional memento ka agütsü aser Maha; amd asorkar aser talisa Deputy Commissiosner, Superintendent of Police aser shilem agir ajunga dang pelaba lemsatepa liasü.



Heatwave aser ibaji ajanga temang nung timtem agütsüba awareness prokshitsü atema Kiphire district kübok Government Higher Secondary School, Pungro nung July 6, 2026 nüHeat Wave Safetu indang poster yanglutepba sentong ka agia liasü.

Gujarat 2008 blasts: HC-i nisung 38 tasüba agi merenshitsü obendang agütsür aliba agizük

New Delhi, Chiteni/July 7 (Agencies): 2008 Ahmedabad serial blasts ken o dak sendakba nung 2022 küm special court kati nisung 38 tasüba agi merenshitsü aser nisung 11 taküm tepeyong tepuokdak ayutsü obendang agütsüba Gujarat high court-i Mongolbarnü agizükogo. Iba lendong nung nisung 56 asü aser nisung 246 yirua liasü.

2008 küm July 26 nü Ahmedabad kübok tesem 20 nung minute 70 tsüingda bomb 21 pokdakja liasü. Iba sülen anogo ana lir surat nunga bomb nguteta liasü. Yimti crime branch-i nisung 100 dak tema aitsü aser nisung 78 obendang daki anir oa liasü.

Justice A.Y. Kogje aser Justice S.J. Dave nati kümtetba division bench kati, special court-i obendang agütsüba anema temepishiba benokba page 7,015 aser

nisung 38 tasüba agi merenshitsü asoshi obendang agütsüba atema osang tejangjaba agütsütsü sorkari mepeshiba asadanga liasü.

Ken o 35 lokteper trial ya agi, kong first information reports (FIRs) 20 benokba densema liasü. Aija alirtem yagi Indian Penal Code, the Unlawful Activities (Prevention) Act, the Explosive Substances Act aser the Prevention of Damage to Public Property Act nung aibelena aliba ngutetogo.

Ken o angadanga mapang prosecution-i tenük kuli agütsür 1,163 asadanga liasü. Security dak sendakba nung tenük kuli agütsür nisung 26 maitsübo miibanga yuogo.

High court-isa Gujarat sorkar dang iba lendong nung asür kinungertem nem sen lakh 10, kanga mejungi yirurtem nem sen lakh 5 aser terara

yirurtem nem sen lakh kaka agütsütsü tetuyuba agütsüogo. Compensation ya 2027 küm March 31 nü tashi nungbo agütsütsüla.

2022 küm February ita special court-i nisung 49 aitsü aser nisung 28 aibelena mali ta obendang agüja liasü.

Taitok agütsürtem rongnung Mubin Shaikh aser Mansur Pirbhoy nata densema liasü. Tena ya yimti amaksü atema sentong yangluba aser Gujarat nung 2002 küm Godhra nung azütokshi lendong atalokba atema mang yanga iba yimti amak ta shia email tem yokba atema aija liasü.

Maneni aitsürtem rongnung taoba mapang Students Islamic Movement of India (SIMI) tekolakba Safdar Nagori aser Gujarat, Madhya Pradesh, Kerala aser Uttar Pradesh densema state 11 nungi pa nem teyari agütsürtem densema lir.

India-i Indonesia dang BrahMos, Astra missile ayoktsü

New Delhi, Chiteni/July 7 (Agencies): India aser Indonesia na Mongolbarnü tenangzüktepba balala yangluogo, kong Brahmos aser Astra missile tem supply asütsüba aser critical minerals dak sendakba nung teka amteper inyaksüba densema lir.

Ato Kilonser Narendra Modi aser tir Prabowo Subianto nati Indo-Pacific nung inyakyim shitak benoka inyaksangshitsü atema bilateral partnership koda tongtibang iba indang lemsatepogo.

Modi tang linük balala semdangba mapang lir aser Indonesia nung mezüngbuba anenzükogo aser iba sülen Australia aser New Zealand semdangsü. Rongsenketzüng jenjang ajungkettsü aser defence tesendaktep akangshitsüba dak rangloker security dak sendakba nung angatettepa inyaksangshitsü aser technology aser rare earths amala commodities tem dak sendakba nung longjemer inyaksü nükjidong nung PM-i item linüktem semdangdar.

Jakarta nung Merdeka presidential palace nung Prabowo den sensak asema sülen, osangbenertem den sensaksemba mapang, linük ana tsüingda kati ka dang tali temulung lemtepba akümba ajanga defence, security aser tzüyim nung inyaksangshi nung tesendaktep tashi taitba kümogo, ta ashi.

Indian Ocean nung inyakyim kümzüka toktsütsü atema linük ana indang Coast Guard longjemer inyaksü, ta paisa shisem.

Kasa mapang nung Prabowo-i, linük anapronglai Indo-Pacific region ya international temzüng ozüng dak ajemdaker ajak atema lapoka aser merek mereka toktsüner ta ashi.

Maneni osangbenertem den

sensaksemba mapang BrahMos cruise missiles aser Astra beyond visual range air-to-air missile tem Indonesia indang armed force dangi supply asütsü telemtetba agiba sangdonga liasü.

BrahMos Aerospace-i, BrahMos missile system atema Indonesia indang defence ministry den contract ka sign süogo aser state meyong Bharat Dynamics Limited-i Indonesia nung private defence holding company tulutiba Republikorp den Astra missile atema tenangzüktepba nung sign süogo.

Linük anapronglai tenangzükbba dak sendakba nung osang tejangja magütsü, saka ken o jangja alirtemi ashiba agi, India-i BrahMos missile system atema battery ana den missiles, launchers aser guidance equipment supply asütsü. Indonesia-i mezüngbo battery ka dang asüngdang saka ana kümogo, ta parnoki ashi.

Astra missile koba India nung yangluba lir, iba ya export asütsü atema tang mezüngbuba tenangzüktepba yangluogo. External affairs ministry-i ashiba agi, iba tenangzüktepba yangluba ajanga India defence industry tashi sayur aser defence export jenjang ajungkettsüogo.

Linük ana yagisa, steel supply chain dak sendakba nung minerals aser technology nung tesendaktep, rare earth magnets development atema tenangzüktepba yangluogo. Maneni Indonesia nung stainless steel slab manufacturing facility ka amenoktsü atema Steel Authority of India aser Pt Krakatau Steel tenangzüktepba yanglu aser aluyimba aser medical products dak sendakba nunga tenangzüktepba yangluogo.

Kerala anentsüh lendong nung nisung 2 asü



New Delhi, Chiteni/July 7 (Agencies): Tzünglu kanga sashia aruba sülen Kerala nung Wayanad district kübok Kalladi tesem nung anentsüh aluba sülen nisung ana asü, teku yiru aser nisung tenet samar bushidar.

Iba lendong ya Western Ghats nung twin tunnel project ka anasa atalok aser ali agi mapa inyakerem tejenokdak, ki ka aser tekülemdak ka anenbangogo.

Lendong atalokba tesem anasa aliba dokan ka indang CCTV footage ajanga tanker truck ka densema gari trokshi aser iba anasa alirtem anena bener aoba nguogo.

2024 küma July ita Wayanad nung anentsüh tesashi ka aluba sülen nisung 254 taküm sama liasü. Iba ya Kerala nung lendong tamajungtiba rongnung ka liasü.

Chief minister VD Satheesan-i ashiba agi, district collector aser disaster management ketdangsürtemi June 20 nü tunnel project contractor tem dang jananongna agintsü atema tetuyuba agütsür

liasü. "Ajisüaka contractor temi item jananongnatem mintok. Iba tesem nung tzünglu kanga arudar, aser iba ajanga teküzmükba maparen nung tetsükdaksü adoker," ta Thiruvananthapuram nung Satheesan-i ashi.

Wayanad nung taoba ghonda 24 tsüingda tzünglu 265 mm aru, koba Mongolbar anepdang 8:30 ako nung anena liasü, ta India Meteorological Department-i ashi.

Satheesan-isa, National Disaster Response Force (NDRF) nungi teküzmükertem aser Kerala Fire and Rescue personnel tem lendong ataloker aliba tesemi yoker lir. Samar alirtem rongnung iba project achaayanga aliba ketdangsürtem aser mapa inyakerem densema lir.

Kasa mapang nung Wayanad nungi member of Parliament Priyanka Gandhi Vadra-i, samar alirtem kümzüksü atema takok tashi inyakdar, ta ashi. Laissa, Satheesan-i teyari agütsüba maparen balala achaayangdar aser police aser NDRF iba

tesem nung inyaksangshidar. State Disaster Response Force team aser civil defence volunteer tema iba tesemi oa lir, ta ashi.

Sanjeev Jain North Korea ambassador asütsü shimogo

New Delhi, Chiteni/July 7 (Agencies): Ministry of External Affairs (MEA)-i, Democratic People's Republic of Korea (DPRK) dangi India Ambassador asütsü Sanjeev Jain shimogo.

Hombarnü official sangdong ka ajanga MEA-i ashiba agi, jain-i iba mapang ya yakta agizüktsü imlar.

Pa ya Indian Foreign Service officer 2008-batch nungi lir aser tang Republic of Cabo Verde indang Ambassador lir.

Jain-i Aliawati Longkumer melentsü, shiba 2025 küm June 16 nü nungi North Korea dangi India indang Ambassador ama inyaka aruogo.

MEA-i ashiba agi, North Korea nung Consulate General of India ya 1968 küm amenok



Major General K S Thimayya lenisüba nung Commission-i tepuokertem melentepba nung tongtibang shilem agiba ya ajaki tenüngsanga jembiogo.

Kasa mapang nung linük ana tsüingda bilateral ken o dak sendakba nung pei tebilemba ya Foreign Office Consultations (FOC) ajanga lemsatepa arudar.

MEA-i taoba mapang ashiba agi, India-i North Korea dang nuclear aser ballistic missile tendangba anena Korean peninsula nung tensa mejungi aliba süngjemshidaksütsü asoshi ayongzüka arudar.

India-isa, sensaksem aser diplomacy ajanga Korean Peninsula nung yimjung bener arutsü atema inyakyim balala benoka inyakba pusema arudar.



TIR YIMYIM YIMOBILEM (EDITRIAL)

DIMAPUR WEDNESDAY, JULY (CHITENI) 08, 2026

Mapa kûma inyaktettsüsa lemtettsüla

Asenok Naga nungertemi yimten nung India den ken o bo renem saka mapa kûma meinyaktetba tebilemtsü aika lir. Item rongnung tamalen renemba onüktema aika lir saka itemji ken o tejen kûmogo, anungji tanü asüng jembiba aser lemtetba ken o indang kar bilemdangdi süra, jet ta asenok mulungjangi NSCN telok ana den mapang balala nung India government-i Naga yimten tebilemtsü ken o tatembang kûma koktetsü asoshi renembatem to arur. Itemji ka "Framework Agreement" aser kaji "Agreed Position" lir. Item Naga yimten ken o ya India den mulungtepa renemba ken o tem lir saka tanü tashi kata mapa kûma matalokteter. Ashiko, ibaji jungjunga mebilemdangi mesüra ken o mena mejembii renemba ken o asütsüa akok, iba jagi alimai meteta Naga yimten tebilemtsü ken o ajak tembanga jembiogo tabo sangdong saka o ji mapa kûma moutet Naga nunger asoshibo tebilemtsüang tuluba kûma odagi. Aji oda, yimten o yimten na tsüngda yimten ken o jembia telemtetba agibaji asayamenüba ken o ka masü, anungji ken o lemteta aodang onük ka nungi ka ta mapa kûma aotsü asoshi mapang tasazük aser inyakyim tejangja latetyonga aotsübaji kanga tongtibang lir. Ajisüaka, telok ajaki pei taginüba onük bendena agizükabo ayu saka itemji kodang komaka mapa kûma inyaka aotsüar mejangjaika ken o tembanger senshira, ken o mulungtepa agizüka ayubaji, tang amaji, amajok akümtsü. Kasaji, tanga ano Nagaland anüdoklen alir kintem asoshi yimten jenjang balaka latettsütsü asoshi Delhi nung oagi India aser Nagaland government aser Eastern Naga People's Organisation (ENPO) tsüngda Frontier Nagaland Territory (FNT) akümtsü asoshi ken o renemer arudang nübortem pelatepba asenoki nguogo. Aji oda, Nagaland nung FNT akümba ajanga Nagaland nung anüdoklen alirtem dang masü saka Naga nunger ajak ajangzüksüsa telemtetba tajung agitetogo ta bilema teimla tulu nung ataa alidang, ano FNT-jia nübortemi ano khen longkak aita takangba agütsü nung dang mapa kûma aotsü amai angu dang kanga sasar aser asenok lenirtem shirnoki asenok Naga nunger ajak tenüng nung India den yimten ken o benoka jembir, parnok dang mepelar, kechiyong asenoki jembia lemtetba yimten o ka mapa mekümtetbaji asenok dak mashimalu aliba sayur. Aji oda, tanga onüktemji khen yutsür ken o renemba mapa kûma moutetba ajanga nübortem jashia alidang, ano terenemba ken o nung lateta aliba sen agi tenük masüng senotsüang enoksemtsü asoshi ashitsü bilemtetba yimtenji tangari retretabo magitsü. Atangji, terenlok mapatem asoshi senotsübo tali tali nüngdaksü, saka FNT atema ken o ajak renemabo ayu aser ano mapa kûma maodangyongi sen talila agüjang ta ashitsübaji tangar tsüngdang asenok metokmeperi tuluka sayur asütsü. Aji oda, FNT asoshi renemba ken o mapa kûma moutetbaji sen masü saka FNT asoshi yimten telemtetba agia aotsübaren nung merajemba onük kar lira, itemjiang indangindanga benoka jembir, tekaratiba nung FNT inyakyim kümtettsü nüngdaker. Ashiko, India government-i senbo agütsütsü mulunga alitsüa akok saka yimten tashi aser temeten agütsütsübjang nungnangtsü akok. Ajisüaka, FNT asoshi latetba ken o nung mapa kûma moutettsüsa merajemba onük kar lira, ibajibo India masü asenok tai asütsü. Asenoki aiben asenoki junga mebilemdangi nübortem nem teimla agütsür aser yimten nunga telemtetba agir, ibayongji tatar senden tashi nung ken o süoka jembir latet saka mapa kûma meinyaktetba telemtetba aika Nagaland government-i agia lir. Ano, item rongnungji FNT onük ya dang masü saka Register of Indigenous Inhabitants of Nagaland (RIIN) asoshi renema aliba telemtetba yaa ka asütsü. Shitakba agibo, government-i telemtetba agir mapa kûma meinyaktetba government-jibo anentsüla. Ajisüaka, nübortemia iba tashijia makanger aser government nung alirtemia iba tashijibo mebilemer. Atangji, item ajakji rajema government nung alirtemi aser lokti nung lenirtemi kodangsa yimten ken o renemdir, ajibo shitak mapa kûma aotsüsa temeteter aser tajangshirtem dang asüngdanga renemtsüla aser kechi ken o renemdir, temulung külen agi masü temulung ajunga agi nübortem asoshi kechi shitak aser kechi junger ta bilemer, iba tangatetba nung renemtsüla.

OLEMSABANG

KISEMER TAJUNG KA

~ Thriocy Stm (Mokokchung)

Lenmang talang süaka
anogoshia pai tepela jakden nung
osang tajungji bener kibok sema jajar,
tsüngsang ajung majung kecha sükshia mali,
nübur asoshi paia taküm bendanga agüja jajar.

Timtema khuret jenti liaka
nübur asoshi amang sangwa metidemi
pai par shisatsü tajungtiba agi
nükjidong tajung yur nüburtem tenzüker.

Pa dak tongmelang ochi shisatsü dena lir,
pai shinga pukhüma mali,
pai ajak den lirumedema liteter,
ajak den kasa litetba taküm ka
timtem jenti ajurua ajangerang
asen kilembok atonger asünungji
Pelashishia agizükdima.

Tanü mobile phone nungi angazükba
aser anguba jagi dangbo kin ka oshiji
tejakleni aotsü makok,
saka shiba amang sangwa metidemi timtem
ajak aremzüka jajar asen kilemboki aiter
pa nungi aseni azüngtsü aser
zülutsü angazüksü akok.

Pai kechi aser koba osang tajung bener arutsür
züba züba dangbo agizüka meyuli,
azüngba denji zülutsü angazükdi pei oshiji.
Pa den akang tembar yimra kin ka
oshiji tejakleni otettsü tesangwa tilaka sayur.

Par shisatsü tajungtiba agi ochi nung
nübur asoshi yimyim ayima sangdonger asünungji
Yimyimji kodangang ayima arutsü
ta yongyaseta ataba nungji
Kin ka oshijia tejakleni aotsü ana nung dang sayur.
Kisemer tajung "*Tir Yimyim*" ji tesendok.

Ak aser boiler an mesütsü atema alishi

Source : Nokinketer

Alishi ya ali tapu ajak nung adoker, wapet tesem, bulua mashiba tesem koba nung jana nunger bendener, aser ali koba nung tsünüsembongtsü yoka amshir item tesem/ali nung alishiji tsünür.

- * Ak aser an mesütsü atema alishiji tu aser shi na prongla amshir.
- * Shi o tu na pronglaji mokongdaksütsü atema bongdang nung tangu meyoki shibanga uteter, tilala lensar yuteter, aser tachitsü aser talangka ayutsü atema anüka menüngsar ayur.
- * Tu nungji protein aika keta lir (20-30%), tsüngküm mongpu ajak nung iba ya shiruru mesütsü atema amshir aser iba ya oil cake melena amshir.

Alishi koma tsünütsü:

- * Aliji 25-30 cm (10-12 inches) tarok tuang.
- * Tu atema tsünütsü sürabang tsünüdangji tetsüngta 90 cm x 90 cm (3 x 3 feet); mesüra 60 cm x 60 cm yuang
- * Alishi tsünütsü mapang tajungtibaji Tsüklai (February) - Monupii (May) ita-tem ya lir. Lenten-i mesüra metongi asenoki atemtsü akok.
- * Yirayira inteter aliba tedongji tasazük 2-3 cm diameter nung alangsatsü. Sünglaklen shilem asem nung ka aser tazünglen cm 10 intoker külen tanüngba shilemji tsünütsü atema alangsa-a amshitsü.
- * Alangsar alibaji jobena atemtsü (ali ponglanglenji junga anüksar külen) aser tsünglanglen 4-6 cm (2'-2'5") ali telung nungji atemtsü. Kodang tzünglu aolen jaka sadema lidir tzülentuji (Irrigation) kecha nüngdak mali.
- * Temer ita pezü sülen tuji shiruru nem agütsütsü atema agizüktettsü.
- * Tu peria manguba mapang amshitsü atema tuji azüla, konger bosta nung seper ayutsü.
- * Tu aser shi na prongla külemi tarutsü atema mokongdaksü-i junga rizünga ayuba nung amshitsü akoker, alangsar bongdang nung tangu meyoki shibanger ayur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung court kati tamanger ka nem temeden agütsü

Lahore, Chiteni/July 07 (Agencies): Hombarnü Pakistan nung aliba court kati Catholic nunger ka tamangba yimsü mezüngmeshi ta tai tonglokja aliba ken o nung temeden agütsüogo, ta pa indang okatsüri ashi.

Lahore High Court indang Attorney Asad Jamal-i ashiba agi, Lahore Additional Sessions Judge Abdul Ghaffar-i arishi küm 37 tain Dennis Albert nem temeden agütsü, shiba Muslim nunger kati Punjab Province yimtiba Lahore nung Quran shisa ta tai tonglochtsüba sülen April 27, 2024 nungi tepuokdak yua liasü.

Albert ya Pakistan indang Penal Code Section 295-A kübok tai tonglokja liasü, koba ajanga tamangertem mulungjang yirutsütsüsa asaa mapa inyakba atema küm 10 tashi tepuokdak ayutsü shia lira ser Section 295-B, koba Quran shisaba indang lir aser yangji aibelener taküm tepiyong tepuokdak ayutsü shia lir.

"Police temi bushisüngdangba nung ozüng tsütsü mabensaba court-i ngutet aser prosecution witnesses temi kuli agütsüba nunga o meyipshiba liasü," ta Jamal-i ashi.

"Ken o benoker Mubeen Ilyas aser tanga witnesses temi Quran shisaba ya Dennis Albert ta tejangja meshitet mesüra pai

lenmang nung Quran tapak kar indokba nguogo ta parnoki meshitet."

Jamal-i ashiba agi, police temi agütsüba CCTV footage tema court-i magizük, kechiaser bushisüngdang temi inyakim shidak meinyak aser tejangja metettsü atema footage ya forensic nung masadang.

"Albert-i asaa quranic pages shisa mesüra asaa tamanger temulung yirutsütsü merang marendaki kuli sayutsüji prosecution mapa liasü. Parnoki aji meinyaktet aser court-i merits nung ajemdaker obendang agütsüba asoshi tenüsang agütsütsü langa lir," ta pai ashi.

Albert indang legal defense ya Cecil and Iris Chaudhry Foundation indang program manager Kashif Aslam-i anepalutsü aser paia temeden agütsüba pela agizük saka iba ken o yagi Albert'er kibong tesem balala nung jenshia lir aser parnok takum asoshi tsüboa bilemtsür ta ashi.

"Ken o tai nung tai maket nisung ka küm ana dak tali tepuokdak ayuba ya kanga tia maka lir. Albert apuba sülen par kibong ya tesem balakai aotsüsa akum, kechiaser parnok aliba tesem nungya taoba mapanga Khristan lanur ana tamangba yimsü mezüngmeshiba tai tonglokja liasü. Lanur ana ya July 2025

nung temeden nguaka security mechi parnok kidangi meyipa meshilang. Albert ya kasa tia nung lir," ta Aslam-i ashi.

Albert ya Lahore tesem balaka nung alitsüsa akumtsü mesüra yimti tanga nung oa alitsüsa akumtsü, ta Aslam-i ashi aser pa takum yanglushitsü asoshi senotsü teyari meshija liasü.

"Albert ya mapudang, tangar indang rickshaw ka anishia kibong mesüa liasü. Pa education peria mali aser küm ana dak tema tepuokdak lir mapa angutsü ya kangasa tasak asütsü. Anungji pa nem senotsü teyari agüja pa takum jenjang yangerba nung yaritsüla."

Albert yagi Quran shisa aser lenmang tezülen yangji tetsüng teas agi ajemshi ta tai tonglokja liasü.

Pa tenu Imran Albert-i taoba mapang Christian Daily International-Morning Star News dang pa teti ya passenger ka meinoktsür ano tangar ataa aliba mapang süyisübonger kati pa merenshi ta shia liasü.

"Pa indang tsüngsem ya rickshaw telung nung liasü, aser pa tsüngsem masem ayazüka alu, kechiaser lenmang kanga tatsük liasü. Pai memeteti lenmang nung aliba kakat tapak kar nung ajem. Aser yangji quranic text lir ta pai memetet," ta Imran Albert-i ashi.

(Maneni tapak 8 nung...)

ANOGO ABEN TSÜNGREM DEN

Khrista ne dak alibaji nütsüngsüba

Aji temeshi pur nem metetdaksütsü Tsüngrem temulung chia liasü: iba miim oji nenok dak aliba, paji sentsüwangshi teimla. Kolosi 1:27

Tetenzük nungi kotaker Tebu sentongji Pa chir tamangertem dak lidaktsütsübaji liasü. Na Khristan ka süra Tsüngrem tabensaba ajak ne dak lir. Khrista takümji ne taküm akümer. Kodang Khrista ne dak lidir, Pai kotaker temoatsü ajak ne dangi bener arur. Ne nüngdak ajak nai kangki nung asüba aser shia aruba aser alima madak Kibuba dak nai angur. Kodang Tsüngremi na Pa mapa nung atentsü ajar, ne taküm ajanga Pai nünglochtsüba mapa inyaktsü asoshi par chir ne dak lidaktsür.

Nü Khristan taküm asoshi ibai tongtipang lir. Nütsüngsübaji tekolok temetetba aser Laishiba tekongtem temulung nung ayuba dang nungi tongtipangba lir. Ibai Yisu Khrista ne taküm nung sadoksadoka litettsüsa ne taküm Pa nem bendanga agütsüba lir.

Na ajanga mapa tulu inyaka na meketa aliba purtem dangi Tsüngremi jungkai adoka sayudaktsüner. Pai ne dak anogo shia ner kibongi Khrista ngua lidaktsüner. Tsüngremi ne taküm ajanga Pa temeim sayudaktsüner. Khristan taküm ka aliba aser ne taküm nung Khrista taküm alitsü melaba nung tepila tulu lir.

India nung Khristanpuri obendanger ka bhukuma nokdaker



Additional District and Sessions Judge Tabassum Khan noksa.

Bhopal, Chiteni/July 07 (Agencies): Madhya Pradesh nung nisung züksetba ken o nung nisung 14 aitsüba sülen obendanger ka tepsettsü amokmerenba aser online hate campaign tenzüka atema India nung Khristan lokti tentet balalai la bhukuma nokdakba lemsatet aser yamai amokmerenba ya linük indang judicial independence amokmerenba lir ta ashir.

All India Catholic Union (AICU) aser United Christian Forum (UCF) ajanga ibai Additional District and Sessions

Judge Tabassum Khan amokmerenba aser kin anema tesempatep adokdaksütsü merangba campaign ka lir ta aitsü, shibai Madhya Pradesh kübok Barakheda nung 2022 küm nisung züksetba ken o nung June 12 nü obendang agüja liasü.

Judge Khan yagi truck driver Nazir Ahmed tepsetba atema nisung 14 aitsü, shibai nashi abener ta tai tonglochtsüba sülen August 2, 2022 nü Barakheda yimtsüng anasa zükset.

Medical kuli, forensic osang aser tai tonglokja alirtem ket

nungi osettsüset ngutetba nung ajemdaker lai obendang ya agütsü aser ibai ozüng agi memelai nisung adenshia züksetba mapa ka lir ta shia liasü.

Nisung aikati iba obendang ya kanga tejangja aser kuli nung ajemdaker agütsüba lir ta tenüsang agüja liasü.

Nisung 14 kinunger temi okadaki aotsü melen obendang agütsüba sülen court kima police indang gari tem mokdanga liasü. Iba ken o nung o tiazü adoka social media aser tesem balala nung longkak aita liasü.

Punjab nung nashi kumzüka ayuba telok ka nungi züngsem temi June 22 nü Judge Khan mesüka yangluba 'effigy' rongdok aser aija alirtem mechiokra azüdokshitsü ta amokmerena liasü. Kin dak kongshia o tamajung jembiba video tem aser online nung amokmeren o anogo ishika prokshiba sülen ketdangsürtem tetsüng ajemoka liasü.

UCA News den July 6 nü jembidang AICU National President Elias Vas-i Madhya Pradesh sorkar, state police aser India indang Human Rights Commission dang Judge Khan kumzüka ayutsü asoshi tekeratiba nung mera agitsü aser item amokmeren mapa inyakertem merenshitsü ajungshia liasü.

Amokmerenba video tem aser social media posts asürtem ajunga jangjar tekeraba nung ajaki metettsüsa mera agitsü Catholic lokti tentet ajanga takhangba agütsüogo, ta pai ashi.

"Amokmerener aser osang agütsürtem tsüngta tepila malitsüla. Iba mapa nung shilem agir ajunga nem ozüng agi melaba ama temerenshi agütsütsüla," ta Vas-i ashi.

Pai Judge Khan aser lar kibong nem maneni security agütsütsü ayongzüik aser linük tesem ajunga nung kin dak sensakba ken o tamajung ketdangsüba obendanger tem wazüka ayuba ozüng reprangshitsü ayongzüka liasü.

AICU-isa state sorkar aser judiciary dang yimjak nung obendanger temi kuli aser ozüng nung ajemdaker obendang agütsütsü ta jangjatsütsüla aser tamangba yimsü tsütsü nungi obendang agütsütsü merangba magizüksüla ta ashi.

New Delhi nung aliba United Christian Forum-ia kasa tebilemba lemsateta liasü.

July 3 nü parnoki sangdong ka agütsüba nung rule of law wazüka ayutsü atema obendanger amokmerenba nungi kumzüka ayutsü tongtipang ta ashi.

"Judge Khan-i ozüng nung

aliba ama iba ken o nung la mapa inyak. Obendang agütsüba tem appellate courts nung benokshia jembitsüla aser yimjak nung amokmeren masütsüla."

UCF National President Michael Williams-i obendanger den parnok nokdaka lir ta ashi.

"Ibai obendanger ka nem security agütsüba indang kisüng masü. Ibai democracy nung tongtipangtiba tongshi - independent judiciary kumzüka ayuba indang lir," ta Williams-i ashi.

July 6 sangdong nung AICU-i Judge Khan indang tamangba yimsü nung rangloker nüburtemi amokmerener, koba forensic aser medical kuli nung ajemdaker obendang agütsüba den kecha nunga sendaktepa mali ta ashi.

Iba obendang anemer temi yimjak nung Muslim nunger obendanger kati Hindu nunger defendants nem obendang shidak magütsütettsü ta shia la indang tamangba yimsü nung tenük yoker, ta AICU-i ashi.

Nashi kumzüka ayiba dak sendakba nung nisung züksetba ya India nung tebilemtsü tulu kumogo aser item nisungtem yagi Muslim, Khristan aser Dalits tem dak tenük yoker aser parnoki nashi belener mesüra nashi shi achir ta tai tonglochtsür.

DR Congo nung Ebola agi asür nisung 500 alemogo



Kinshasa, Chiteni/July 07 (Agencies): Democratic Republic of Congo (DR Congo) nung Ebola tashidak poktetba sangdonger ita ana majungdang nisung 500 dak tema süogo, ta World Health Organization (WHO) ajanga ashi.

Iba tashidak poktetba ya May ita tiyonglen sangdong aser tang tashinung iba tashidak agi nisung 1,561 menepba tejangja lir aser 506 asüba jangjaogo.

Congolese health authorities nungi osang lemsatepba nung ajemdaker WHO data nung iba tashidak agi meneper noklang nung shilem 32 asüba sayur. Nisung 254 taneptsü nguogo aser iba tashidak agi menep südi ta temulung malemba cases 354 bushisüngdangba mapang lir. Iba tashidak ya DR Congo northeast tsütsü province pezü nung prokshia lir aser Ituri province nung tamajungtiba kongshi.

Kidanger Uganda linük nunga Ebola dak sendakba

tasüba ana lir, ajisüaka yangji ketdangsür temi tensa azüokteta lir ta ashir. Iba linük nung cases tejangja 20 aliba nungi nisung 16 taneptsü nguogo.

Tang pokteta aliba ya Ebola virus sernung kanga bulua maliba Bundibugyo strain ajanga lir, aser iba atema tang tashi vaccines tejangja mesüra anepaluba yimya balaka mali.

Taoba hopta research agirtemi DR Congo nung therapies ana clinical trial tenzükogo - monoclonal antibody MBP134 aser antiviral drug remdesivir - aser anaprong ya meyokteper mesüra balala tendanger.

Health ketdangsür temi maneni iba tashidak kanga temulung agüja asadanger, saka rara agi kongshia aliba tesemtem nung iba tashidak menatepa aoba azüoktsü merangba nung tetsükdaktsü ajurur.

Tarutsü nung health emergencies asoshi renemshia

aliba tashi itshitsü atema global pandemic agreement ka nung tanüngba elements indang WHO züngsem linüktemi jemshishinü tenzükba mapang iba tetsübotsü osang ya arur.

WHO Director-General Tedros Adhanom Ghebreyesus-i Ebola tashidak poktetba ya ajanga iba sülen pandemic atema alimai renemshiba nung memonutsü sayur ta ashi.

"Ebola tang DRC nung jatetba mapang aser ibaji kuli lir. Iba ya tang majangshitsüba indang tensa ka masü. Iba ya tang ataloktar... Taruba pandemic ji Ebola masütsü akok. Saka tebilemtsü kodanga mainshitsü ta sayur," ta Ghebreyesus-i ashi.

Ituri province nung rasaa meshiteti nisung asüba sülen DR Congo-i May 15 nü Ebola tashidak 17 ben poktetba sangdonga liasü. Iba virus ya menaa aliba nisung anasai aoba mesüra kongshiba aser temang nungi tzü aluba ajanga menateper.

Venezuela menoknok lendong nung asür 3,500 dak tema jungogo

Caracas, Chiteni/July 7 (Agencies): Taoba hopta menoknok tesashi ana agi Venezuela anokshitsüba sülen nisung 3,500 dak tema süogo aser nisung 18,000 shi talidak ki maka kümogo.

Venezuela menoknok lendong nung asür nisung 3,535 jungogo, aser ozüng yanglur Jorge Rodriguez-i Hombarnü ashiba agi, nisung 16,740 yiruogo aser 17,854 talidak ki maka kümogo. Kasa mapang nung nisung 12,800 shi Caracas aser La Guaira kübok tejenokdak balala nung jenoka lir.

Hombarnü La Guaira nung tenük kuli agütsürtemi Reuters news agency dang ashiba agi, parnoki truck aser forensic worker temi coffin tem belener aoba aser machine agi ongken tur idakji tasü mangtem aremba nguogo.

June 24 nü second ishika dang tetsü ngda iter 7.2 aser 7.5 magnitude tesashi menoknok ana agi Caracas aser La Guaira temeket anokshija liasü.

Iba lendong nung ki 60,000

shi raksatsüogo.

Mongintemi health dak sendakba nung timtem tulu adoktsü ana nung lir ta tekümdangtsü metetdaktsüogo, kechiyong Venezuelan nunger talidak malirtem meyrejang aika tejenokdak balala nung mejangdar aser parnok tzü temerek agi anünga lir. Nisung meyrejang aika yiruba junga anepalu mesüi lir aser menatepa aoba tashidak balala agi tonger lir, aser linük healthcare system-i item nisungtem ya mayimjemteti arudar.

Kasa mapang nung teyari nü ngdaker aika küma aoba mapang menoknok lendong nungi jenbortemi sorkar aija arudar.

Sorkar tekü mzü kba maparen agi temulung mesüi lisopurtemi taküm alirtem bushitsü aser teyari balala alemtsü asoshi sorkar matai jenjang agidar. Washington Office on Latin America (WOLA) tir Carolina Jimenez-i Al Jazeera dang ashiba agi, state anema nüburtem tali tali

meit adok tenzükogo.

Maneni Volunteers temi taküm alirtem bushitsü atema tenangzükba agütsüogo.

SANGDONGER

Asür Temjensoba'er jabaso Mr. Purtongzük Jamir, Luyong (Molungyimsen) dang shirnokisa kinungertemi memeteti alu, kimong alia lir, mesüra alitir, aji par khuret asütsü ta kinunger lemtet iba sangdong ajanga metetdaktsür.

Sd/-
Asür Temjensoba'er
Chirnur aser kinungertem.
Molungyimsen.

Macron-i Damascus semdangba mapang bomb ana apok



Damascus, Chiteni/July 7 (Agencies): Damascus nung France tir Emmanuel Macron senden amentsü aliba hotel anasa Mongolbarnü bomb ana poka liasü, ta Syria state media-i metetdaktsü. Ajisüaka France tir office sangdong ajanga ashiba agi, pai bomb apokba ola mangashi aser iba sülen mapang tatsüka lir Syria tir Ahmed al-Sharaa den ajurute pogo.

Bomb apokba ya Syria asoshi security dak sendakba nung tetsükdaktsü tulu asütsü, kechiyong Sharaa-i aniba teloki 2025 küm Bashar al-Assad-i aniba sorkar atsü ngtokba sülen Macron ya European Union linüktem rongnungi state ka tekolaki tang mezü ngbuba Syria semdangba liasü.

Mongolbarnü Syrian tourism ministry aser national museum na tsü ngda kanga dang mazü ngi aliba tesem ka nung bomb ya pokogo, koba Macron lokti tentet balala den senden amentsü aliba Four Seasons hotel opposite nung lir.

Syria indang state news agency-i ashiba agi, iba lendong nung police pezü densema nisung 18 yiruogo.

Macron indang motorcade presidential palace-i aoba sülen mapang tatsüka dang lir mezü ngbuba bomb apok. Reuters-

i lemsatepba video nung tanabuba bomb apokba sülen jana bendenba bongdang ka nungi milak aser moko zü adokba sayuogo.

Tanabuba bomb ya lendong atalokba tesem anasa ambulance ka zü ngdang apok, kong nisung 20 dak tema adenshir liasü.

Reuters video ajanga bomb mapok tsü ngda Macron indang motorcade highway leni aoba sayuogo. Iba sülen pa Sharaa aser tanga Syria nunger ketdangsür aser military officer tem den nokdaker tangokba noksa nguogo.

Bomb pokdaktsürtem jangjatsü atema internal security force temi bushisü ngdang tenzükogo, ta Syria indang state meyong Al-Ekhbariya TV-i metetdaktsü. Bomb apokba sülen lenmang shibangogo aser security akangshiogo, ta security source kati Reuters dang ashi.

France tir-i ashiba agi, presidential motorcade nungi bomb apokba ola junga mangashi aser Macron den külemi senzüba osangbenertem rongnung dena aliba Reuters osangbeneria bomb apokba mangashi, mesüra mepetmesü adokba kecha mangu, ta ashi.

Tir-isa, pa sentong athitsü kecha tebilemba mali aser sentong yanglur aliba ama dang inyakyonga aotsü, ta shiogo.

BLA-i Pakistan sepai 17 tepset, 15 pua bener ao

Islamabad, Chiteni/July 07 (Agencies): Balochistan Liberation Army (BLA)-i osangtsü sang agitepa Balochistan kübok Ziarat district nung security post ka amak. BLA-i tongtipang Mangi Dam project anükba tesem amakba nung station house officers (SHOs) ana densema police 17 takum samatsü. Telungpuri iba azü dokshi tenü ng agia Pakistan southwestern province nung security tebilemtsü tali jangjatsür.

BLA-i am mang nung iba outpost ya sapanger amak tenzüka mapang talangka khatapa liasü. Ketdangsür temi osang balala ajanga ashiba agi, iba lendong nung sepai aika yiru. Ano police 15 samaba ajanga tensa tamajungba

kumdaktsü, shirnok tang samar bushiteptar aser jena aoba telungpur temi pua bener ao südi ta bilemer.

Asürtem tasü mang agizüker province yimtiba nung akhum agüja sentong ka agiba sülen parnok tasü mang ya pei aliba tesem temi yokogo.

Iba tesem amakba sülen paramilitary troops indang joint task force, local police aser counter-terrorism personnel densema Pakistan indang security forces temi Mangi Dam temeket aser Ziarat district nung search operation tesashi ka tenzük.

Iba azü dokshi lendong agütsürtem bushitsü aser samar aliba police tem kumzüksü nü kjidong nung sepai balala lungjemer operation ya tenzüka lir.

Sorkar indang odongtari iba azü dokshi ya tasü mait mapa aser region nung tesunep raksatsütsü aser tongtipang ki o jen raksatsütsü nü kjidong nung inyakba lir ta aitsü.

Balochistan nung küm aika sorkar anema iba ama azü dokshi lendong agüja arur, kong BLA ama nokdanga aliba telungpur temi linük sepaitem, energy networks aser bendangeri senotsü teyari agüja ki o jen yangluba mapa nung tetsükdaktsü agütsütsü nü kjidong nung azü dokshia timtem agüja arur.

Pakistan nung Balochistan ya ali rongsen talubosa aliba province ka lir, saka yangi telungpur tebilemtsü aliba ajanga lenmang ajaklen tangar memenepi nüburtem timtema alir.

World Cup: Spain aser Belgium na quarter-i iogo



FIFA WC Round of 16 asaya nung Spain-i Portugal madak takok ngur pelateper.

Chiteni/July 7, 2026

(Agencies): Cristiano Ronaldo nung World Cup nung asaya temulung raksa-a tembangogo.

Spain aser Portugal na round of 16 asaya nung substitute Mikel Merino-i mapang apuloktsür asayaba mapang mezügbuba minute nung goal ka idaktsüba sülen Spain-i goal 1-0 agi iba asaya koka parnok quarter-finals tongtetogo.

Spain taruba asaya Los Angeles nung Hokolbarnü United States den asayatsü.

Dallas Cowboys' stadium nung team ana ya tetenzük nungi kanga toktepa asayaba sülen asaya tatemtsü lia Ferran Torres-i agütsüba ball ka Merino-i idakja iba goal yagi takoker bendanga liasü.

Iba asaya masaya tsüingda arishi küm 41 tain Ronaldo-i, iba asayamung ya pa asoshi tatembangbuba World Cup asütsü ta shir liasü. Pa World Cup nung tokben asayaogo,

saka khen danga iba asayamung mekoktetei asaya nungi anisüngzüksü.

Asaya nung Ronaldo aser Spain nung lanur asayar Lamine Yamal nati kanga junga asayatsü imla liasü, saka tenapronglai imlaba ama masayatet.

Iba asaya akokba sülen Spain team taküm Word Cup nung khen danga tamakok mongui asaya arudar.

Seattle nung tanga asaya ka nung Belgium-i goal 4-1 agi United States' koka parnoka quarter-final tongtetogo.

Asaya nung Charles De Ketelaere-i kanga junga asaya-a goal ana idaktsü aser goalkeeper-i aibanelba sülen Hans Vanaken-ia goal ka idakja liasü. Maneni substitute Romelu Lukaku-i mapang apuloktsür asayaba mapang Belgium atema goal pezübuba idakja parnoki asaya ayong ayonga kokogo.

Asaya metenzük tsüingda

Folarin Balogun nem taoba asaya nung red card agütsür aliba agintsüba ajanga mepetmesü adoka liasü. Pa red card achi asünung iba asaya nung masayatetsü liasü, saka US tir Donald Trump teyongtsüi aiba sülen iba red card aginja pa tetenzük nung asaya aser iba ajanga aikati FIFA aija liasü.

Asaya nung mezügbuba goal ya De Ketelaere-i minute tekububa nung idaktsü. Iba sülen United States-ia minute 31buba nung Malik Tillman ajanga goal ka idaktsü.

Ajisüaka minute ana dang lir De Ketelaere-i Belgium atema tanabuba goal idakja parnok maneni tejakdang aküm.

Maneni asaya nung US goalkeeper Matt Freese-i aibelen ka menaba sülen Vanaken-i tasembuba goal idakja parnok ayong ayonga aküm aser tatemsa Lukaku bench nungi aita goal pezübuba idakja asaya koka liasü.

Taoba Afghanistan fast bowler Zadrán süogo



Chiteni/July 7, 2026

(Agencies): Taoba mapang Afghanistan national team nungi fast bowler Shapoor Zadrán, shibai par linüki World Cup nung mezügbuba asaya ka akokba mapang tatembangbuba run yanglua liasü, pa arishi küm 38 nung süogo.

Afghanistan Cricket Board (ACB)-i Zadrán asüba osang lemsatepogo. Pa ya tangar dak kangabo bulua matonga immune tashidak ka atema New Delhi nung temang anepaluya liyar süogo.

Zadrán 2009 nungi 2020 tashi nung Afghanistan tenüing nungi ODI 44 aser T20 36 nung asayaogo aser iba mapang pai wicket 80 agia liasü.

Pa indang career nung jangrademtsü takettiba mapangji 2015 küm World Cup nung Scotland den mezügbuba asaya akokba nung run tatembangbuba yangluba ya asütsü.

"Shapoor Zadrán ya Afghanistan cricket nung mezügpur ka liasü, shibai tejangraba tulu nung bendanga

agüja inyakba ajanga linük nung cricket asaya renloka aoba nung teyari tulu agütsüogo," ta ACB-i sangdong ka ajanga metetdaksü.

"Pa career tepeyong Shapoor-i Afghanistan cricket ya tasüita, nema danga aser akümstüba tenzüko.

"Pai teyari agütsüba aser pa takok ya Afghanistan cricket puti otsü nung teti tongtibang shilem ka asütsü aser pai national team atema kechisa inyaktetsüogo item ya kodanga mamatoktsü," ta kasa sangdong ajanga metetdaksü.

Kasa mapang nung taoba mapang India nung all-rounder, national team head coach aser tang commentator Ravi Shastri-i X ajanga Shapoor Zadrán asüba osang angazüka temulung korema mang ayimba lemsatepogo.

"Afghanistan cricket asaya nung renloka aoba mapa pa-architects tongti ka liasü, aser pai iba asaya aser team atema kechisa inyaktetsüogo iba ya teti bilemettsü.

"Par kinunger medemer aser Afghanistan cricket fraternity den asükhu lemsateper," ta paisha shisem.

				
TESÜSABA ASAYA OSANG				
Portugal	0	1	Spain	
USA	1	4	Belgium	
ROUND OF 16				
July 07	9:30 PM	Argentina	VS	Egypt
July 08	1:30 AM	Switzerland	VS	Colombia

Tottenham-i Tonali £100m agi alizükogo

Chiteni/July 7, 2026

(Agencies): Tottenham-i Newcastle midfielder Sandro Tonali pound million 100 jungnüa agia lizükogo, koba asayar ka sen timtiba agi alizükba club record asütsü.

Newcastle nung season asem asayaba sülen arishi küm 26 tain asaya ya Tottenham nung denogo.

Spurs puri pa atema mezüing pound million 80 agütsüdag saka Newcastle-i magizük, saka tang tangatettep ka dangi aruogo aser parnoki mezüing pound million 92.5 agütsütsü aser iba sülen ano add-ons pound million 7.5 agütsütsü imlar.

"Ni iba club nung adenba atema pelar," ta Tonali-i ashi.

"Ni head coach [Roberto de Zerbi] den club, fan tem aser stadium aser club football indang ghonda ana shi sensaksema liasü. Iba sülen ni Tottenham nung adentsü ta jangja aküm," ta paisha shisem.

West Ham nungi Mateus Fernandes pound million 85 agi alizükba sülen Tonali tang club

nung denogo.

Italy nung asayar ya 2023 küm July ita AC Milan nungi pound million 55 yong Newcastle nung aden.

Pa club nung adenba sülen mapang tatsüka dang lir betting temzüing özüing nung aibelenba atema Italian Football Federation (FIGC)-i ita 10 atema tenokdangba agütsü.

Ajisüaka pa meyipa aruba sülen Newcastle asoshi tongtibang asayar ka aküm aser parnoki 2025 küm Carabao Cup koka liasü, koba küm 70 tsüingda club asoshi mezüingbuba takok marok liasü.

Tottenham pur taoba season tera agi dang Premier League nungi relegated masüba sülen parnok tang team yanglushiba mapang lir.

Defenders Andy Robertson aser Marcos Senesi na club nung denogo aser ano parnoki centre-back Jan Paul van Hecke aser midfielders Fernandes aser Tonali nung atema pound million 237 entoktsü imlar.

KHRISTAN OSANG : Tapak 5 nungi...

Pakistan nung court kati tamanger ka...

Pakistan indang blasphemy laws ya mapang talangka nungi human rights organizations aser legal experts temi aija arur, shirnoki iba özüing ya meshidaki amshia jurila mangatettep nung amshir, ki o jen rakzüker aser tamangba yimsü tsütsü kin tilatem dak tenük yoker amshir ta ashir.

Pakistan nung blasphemy laws ajanga temerenshi agütsüba mali, saka tamangba yimsü mezüingmeshiogo ta tai tongloktsüba yong aiben nüburtemi azüdokshia nisung tepsetba aser okadak ken o mejemebi mapang talanglang tepuokdak ayuba lir.

July 1 nüa arishi küm 61 tain Catholic nung ka advanced dementia agi timtema alir tiazü nung tamangba yimsü mezüingmeshi ta tai tonglokja obendang ataa tepuokdak küm ka jungnüa lir asü. Pai bail meshiba bhukuma medical testimony court ka nung angatsü anogo ishika lia Amir Peter ya

temang junga anepalu mesüi asü, ta Christians' True Spirit (CTS) indang executive director Katherine Sapna-i ashi.

Lahore nung aliba Nishat Colony nungi peter ya July 19, 2025 nü Muslim nung token kibur kati blasphemy law Section 295-C nung aibelen ta tai tongloktsü, koba Islam indang prophet Muhammad anema o tamajung jembiba aitsüba indang lir aser tasüba temerenshi agütsür. Peter-i dokan kibur dang oset nung sen tali meshi ta aitsüba tayang kepzüka dokan kibur-i iba ken o ya benok.

International advocacy groups temi alima nung Khristanpur alitsü linük tamajungtiba rongnung Pakistan ya ka lir ta ashir. Open Doors ajanga alima nung Khristanpur alitsü linük tamajungtiba 50 asadanga 2026 World Watch List nung Pakistan ya jenjang ti buba nung lir.

BILEMDANGANG

"Temulung sunepa alitsü atema tangar tebilemba nem na tanishidaktsü."